

Manfaat 13,431 peluang pekerjaan di JAKM Terengganu - PM

Oleh Zatul Iffah Zolkipli dan Baharom Bakar - Jun 4, 2022 @ 1:50pm
bhnews@bh.com.my



Perdana Menteri, Datuk Seri Ismail Sabri Yaakob (tengah) semasa merasmikan Jelajah Aspirasi Keluarga Malaysia di Kompleks Sukan Negeri Terengganu di sini hari ini. - NSTP/ GHAZALI KORI

KUALA NERUS: Rakyat Terengganu perlu merebut peluang disediakan melalui Program Jamin Kerja sempena Jelajah Aspirasi Keluarga Malaysia (JAKM) di negeri ini untuk mendapatkan padanan pekerjaan bersesuaian.

Perdana Menteri, Datuk Seri Ismail Sabri Yaakob berkata, ini kerana 13,431 peluang pekerjaan tersedia sempena program berlangsung pada pentas JAKM di Terengganu hari ini, yang ditawarkan melalui 89 majikan.

"Ini (peluang pekerjaan yang tersedia) sekali gus membolehkan Keluarga Malaysia di negeri ini dipadankan dengan pekerjaan yang sesuai," katanya ketika berucap sempena penganjuran JAKM di Kompleks Sukan Negeri Terengganu di sini hari ini.

Dalam pada itu, beliau berkata, kerajaan juga cakna tentang kebajikan pekerja yang hilang upaya untuk kembali bekerja, yang mana mereka ditawarkan bantuan alat pemulihan supaya dapat melaksanakan pekerjaan dengan sebaiknya.

Katanya, kerajaan Terengganu melalui kerjasama Pertubuhan Keselamatan Sosial Pekerja (PERKESO) di bawah Kementerian Sumber Manusia juga bekerjasama untuk memperkasakan akses peluang pekerjaan bagi rakyat negeri ini melalui 38 Pusat Pintar yang menyasarkan 1,000 penempatan pekerjaan.

"Alhamdulillah, kita telah berjaya melepasi sasaran ini dengan 1,351 tawaran pekerjaan sejak ia dilaksanakan pada Disember 2021 sehingga April tahun ini dengan PERKESO berperanan sebagai Urusetia Pekerjaan Negeri Terengganu (UPNT)," katanya.

Selain peluang mendapatkan padanan pekerjaan bersesuaian, Ismail Sabri juga berharap Keluarga Malaysia dapat memanfaatkan setiap peluang yang ada sepanjang penganjuran JAKM di negeri ini.

Beliau turut menzahirkan ucapan terima kasih kepada warga Terengganu atas sambutan menggalakkan serta komitmen padu ditunjukkan kerajaan negeri.

"Saya berharap aspek keterangkuman, kebersamaan dan kesyukuran dalam masyarakat majmuk Keluarga Malaysia ini terus diamalkan tanpa mengira sentimen agama dan bangsa," katanya.